



2 Maret 2023
Hosea 8: 1-14



Pecah-Pecah Kudin Taneh



Bagi pecah-pecah kudin taneh perper lanai terpekena, lanai erbentuk, lanai banci ibahan sikap mulihi. Iandingken me enda bagi sada keadan lanai sikap, lanai jore dengen lanai lit si man arapenken. Adi iandingken kempak kegeluhen manusia, eme situasi si tuhu-tuhu ancur-ancuren. Kudin si tangtangna dem alu guna banci ipake guna nasakken nakan guna mesuri beltek. Perlu kel kita kempaksa. Tapi adina enggo ancur tentu enggo melala kerugin jadina.

Dibata ngandingken bangsa Israel asum si e bagi pecah-pecah kudin taneh, melala hal si ilakokenna lanai ngena ate Tuhan. Itulakna hal si mehuli, ijadikenna gana-gana guna isembahna, kerina si ilakokenna bakal sia-sia/ labo erguna man bana (kalak si deban engkerikenca). Bangsa Israel e la sedar reh buena gana-gana si ipajekkenna, reh buena dosana. Reh bagesna ia gedap bas kubang dosa. Kerina persembahen si iberekenna man Dibata ciga ate Dibata dengen la ialokenNa pe.

Kegeluhen kalak si erkiniteken min reh dekahna reh sikapna. Reh buena perbahanen-perbahanen si mehuli si idalankenna. Tapi la banci sipungkiri maka kalak si enggo terjerat bas kubang dosa banci jadi reh dekahna reh mbagesna ia seh maka gedap ibas dosa. Ukumen-ukumen Dibata nari la erngadi-ngadi engkenai ia. Ancur kel kegeluhenna. Ije me kalak ngerana “sayang kel sebab idah sedekah enda sikap kel kegeluhenna, ernanam kel man sekelewetna dengen banci ikataken usihen si mehuli”.

Ija nari nge bena-benana e kerina? Ibenaken arah kinilasetian nandang i Dibata. Erdua ukur man Dibata erbanca bangsa e lanai nginget Dibata si enggo ngarak-ngarak kegeluhenna menaken kin nini-ninina sedekah enda. Lanai erpenalem man sada Dibata ngenca, enggo lit tandinganNa ibahan. Tole ka adi lit dosa arah perbahanen si melket tapi ipediat bage-bage saja, lalap idalanken alu sedar entah la sedar pe enggo jadi kebiasaan. Ije me reh teridahna maka kegeluhen manusia e lanai bersih. Kalak si bage me ndatken ukumen ibas Dibata nari. Adi Dibata enggo lanai erngena ate, reh bahayana nari nge ngenca litna. Alu bage Kata Dibata enda mereken persinget man banta gelah nggeluh uga bagi sura-sura Tuhan dengen tetap setia amin gia lit perbeben nderpa kegeluhenta.